

INUIT ATAQATIGIIT INATSIARTUNI



UKA2023/Imm. 28

Uunga siunnersuut:

Ilinniartut ineqarfii pillugit Inatsisartut inatsisaata allanngortinneranik Inatsisartut Inatsisissaattut siunnersuut

(Meeqqanut, Inuusuttunut, Ilinniartitaanermit, Kultureqarnermit, Timersornermit Ilageeqarnermullu Naalakkersuisoq)

Oqaaseqaat:

Ilinniartut ineqarfii pillugit Inatsisartut Inatsisaata allanngortinneqarnissaanik Naalakkersuisut siunnersuutaannut Inuit Ataqatigiit sinnerlugit qujarusuppunga.

Pingaarnertut allannguutissatut siunnersuutit pingasut pineqarput – oqaatsitigut naleqqussaanerit saniatigut.

Siullertut siunnersuutigineqarpoq ilinniartuq toqukkut qimagussimappat qimataasut ilinniartut inaanni qaammatit 4-t tikillugit najugaqaannarnissaannik periarfissaqarnissaat. Taamaasillunilu ullut qulit ingerlaneranni inimik allamik nassaarnissamut piffissaliusseq sivikippallaarujussuutoq qaammatit 4-t tikillugit sivitsorneqassooq.

Aappaattut siunnersuutigineqarpoq ilinniartup ilinniakkani ineruniuk ilinniartut inaanni Naalakkersuisut atorunnaarsitsisinnaanerat pillugu saneqqussinissamut periarfissaqalersitsineq – taamaalilluni ilinniakkamik inerlaap soraarummeerluni naggataarnermi peqataasinnaanissaa allannguutissamut siunnersuutip qulakkiissavaa.

INUIT ATAQATIGIIT INATSISARTUNI



Pingajuattullu allanngortinniarneqartoq tassaavoq ilinniarnermut atatillugu suliffimmiikkallarneq imaluunniit atuarfimmiikkallarneq pequtigalugu ilinniartup ilinniartut inaat najunngikkallarnerani Naalakkersuisunut atugassiissutiginnissaanut pisussaaffimmut aalajangersagaq. Aalajangersakkami ersarissarniarneqartoq tassaavoq ilinniartut inaat najunngikkallarnerani Naalakkersuisunut atugassiissutiginnissaanut pisussaaffeqarneq taamaallaat atuutsinneqassasoq inoqutigiit (imaluunniit inoqutigiit ilaannaanit ilagineqartut) tamarmik peqataanginnissaat pineqarpat. Matumanilu nassuiarneqartutut siunertaasoq tassaavoq ilinniartut inaat sapinngisamik pitsaanerpaamik atorneqartarnissaat qulakkeerneqarnissaa.

Taama naatsumik oqaaseqarlunga - Inuit Ataqatigiinniit Naalakkersuisut allannguutissatut siunnersuutaat akueraagut.